

[0067]

**BY IT OFSKIE FAN PROF. DR. J.H. BROUWER**

Doe't Prof. Brouwer as heechlearaer to Grins ôfgyng, om al syn krêften en kinnen oan 'e Fryske Akademy to jaen, hat er him tagelyk út 'e redaksje fan 'Us Wurk' weromlutsen. Wy moatte dit bislút fansels ynskikke, al hoe't it ús ek muoit, dat syn namme tonei net mear ûnder de bistjûrders fan dit bled foarkomme sil. Ommers, hy wie de man, dy't yndertiden de foarstapta it oprjochtsjen fan dit tydskrift nommen hat. Hy hie foar it forstân, dat der nêst 'It Beaken' plak wie foar in orgaen, dêr't de taelkunde better har gerak yn krije koe. It oanwinnende tal meiwurkers fan it Frysk Ynstitút to Grins makke it boppedat winsklik, dat dy ynstelling in eigen blêd foar meidielingen ta har foldwaen hie. Hoe tige as dizze opset fan Prof. Brouwer der by de lêzers ynfallen is, docht ek hjir wol oan bliken, dat 'Us Wurk' al rillik gau mei de krapte to rieden hie. Nei de fjirde jiergong moast de omfang fan 64 ta 96 siden útwreide wurde. Kamen de bydragen yn 't earstoan noch allinne út Nederlân yn, in jier letter wie it al mûglik, it earste artikel fan ien fan ús Noardfryske stambrueren op to nimmen en sont binne de swetten hieltiten wider utlein. Giet men by de rige fan meiwurkers lâns, dan sjocht men, dat der guon by binne út Hollân, Flaenderen. Dútsklân, Ingelân en Frankryk, wol in biwiis, dat it blêd rounom op priis steld waard. Troch de meidielingen oer it wurdboekwurk, de samlingen en de nije oanwinsten fan it Ynstitút, en binammen ek troch de bibliografy kin gjinien, dy' t niget oan 'e Fryske taelkunde hat, it langer bûten 'Us Wurk' stelle,

Mar net allinne dat it Prof. Brouwer slagge is, oaren yn 't spier to krijen foar it tydskrift, dat mei rjocht en reden 'syn wurk' neamd wurde mei, sels hat er ek forskate stúdzjes dêrfoar skreaun, lyk as koartlyn noch it nijsgjirrige artikel 'Nei de tsjerke om nijs', dêr't gâns materiael yn gearswile is.

Sa wie 'Us Wurk' oant nou ta in klare spegel fan 'e warberens fan it Frysk Ynstitút to Grins, dat troch Prof. Brouwer syn tûke lieding foar in sintrum fan 'e Fryske filology to boek stiet. Dy goenamme hat it mei to tankjen oan 'e útjefte fan in rige 'Estrikken', dêr't de heechlearaer-direkteur yn it lêstoan fan 1952 ta oergyng. Mei foldwaning kin er weromsjen op net minder as 16 nûmers, dy't ûnder syn bistjûr yn 't locht jown wurde koene. Dizze teksten en stúdzjes, dy't foar in part mûnske boekwurken net wanlyk binne, hat er de lêzers yn yn- en útlân in tige deugd mei dien. Itselde jildt fan de winterlêzingen, dy't fan it Ynstitút útgongen en dêr't ornaris in bulte lju op tasetten kamen.

It seit himsels, dat nei it ôfskie fan Prof. Brouwer, dy't sa'n ûnbidich stik wurk foar de Fryske taelwittenskip forset hat, it tydskrift 'Us Wurk' en alle oare aksje fan it Ynstitút ûnder syn opfolger krekt-en allyk trochgean sille. Wy tankje Prof. Brouwer, mei út namme fan 'e lêzers, foar alles hwat er foar ús blêd dien hat en foar de kostlike útjeften, dy't ûnder syn taforsjoch ta stân kommen binne.

Wy winskje de ôfgeande heechlearaer en haedredakteur fan herten it bêste en hoopje, dat er yn syn nije funksje to Ljouwert mei likefolle

seine as yn Grins foar ús heitelân arbeidzje mei.

*Redaksje.*